

《續修四庫全書》編纂委員會編

續修四庫全書

上海古籍出版社

六七五・史部・地理類

〔道光〕廣東通志三百三十四卷首一卷（卷二百八十四至卷三百三十四）〔清〕阮元修

陳昌齊等纂

2672/05

廣東通志卷二百八十四

列傳十七 廣州十七

韓上桂 袁崇煥

霍子衡子應蘭 應正 黃公輔

陳子壯 唐夢鯤

區致遠 陳策開寶明

朱實蓮 黎宏業

廖翰標 蕭奕輔

尹明翼 劉士斗

明

韓上桂字芬男一字孟郁號月峯番禺人明詩餘人父禹梁嫺吟詠家貧授徒三子皆自教之上桂

居長山房集父夢美丈夫持青蓮拜呼為大人

遂生番周幼穎悟絕倫日誦萬言如宿記嘗借人

二十一史一覽即默識其人物地名十六為諸生

聞士默特結連西部數為邊患慨然有投筆志於

是學擊劍馳馬天官兵法壬遁之書靡不研究弱

冠舉萬曆甲午賢書第六先是倭陷朝鮮求援於

朝鮮師出久無功遂議封貢公車抵京詣闕上書請

以奇兵出海道扼而殲之不報是科禮闈擬榜首

以擬韓范招討表內有碎首玉階四字觸忌遂落

乙榜例得教職不謁銓而歸戊戌再不第遂放懷

詩酒遊咏勝地兼喜填詞度曲著有凌雲記填詞

城切集四衍詹言雞肋篇又有雜稿選名益著才

氣可方吳中桑民懌是萬曆間嶺南第一才子明

終時與同里陳子壯韓日續李待問等為聲氣交

庚戌丁外艱丙辰復乙榜以母老署定州學正著

定州志畧刻本在定後亡於兵今僅丁巳冬奔母喪歸作五惜以自責服闋補易州學正天啓壬戌

赴春官會討山東白蓮賊賊方熾廷議欲得儒生

知兵者往覘其勢未有應也舊袂請行首輔葉文

忠公壯之加國子博士參謀究師事忠者中以蜚

語遂不果請假還里尋以魏閣亂政不仕崇禎改

元起南國子博士改助教歷監丞久之攝如皋令

有政聲轉永平通判是時中外用兵南北飛輓餉

匱軍謀輒慮脫巾下車漁蠶餘除計漕之多寡所

載幾何上下大小盡如龜形中以十字歸算百艘

如一不錯升斗不半月完運邊軍賴濟遼撫方一

藻才之大為薦賞尋遷建寧同知仍留餉邊上桂

扼腕時事鬱鬱無所試酒酣拔劍起舞慷慨悲歌

或至墮淚一夕仰視天文憂形於色其子驥超從

子驥超叩其故曰乾象異甚變將不測其在甲申

乎汝曹可速歸事親吾死官守矣皆泣下梁雲山房集

其叔玉海不願歸語上桂曰離家萬里同死何恨

昨夢秋荷墮手恐非佳兆上桂頌之番禺志甲申三月流賊陷京師報至慟哭不食卒於寧遠城完節日撫鎮經紀其喪次子駿超奉靈輜歸番禺志乾隆四十一年

賜諡節愍

旌朝殉節諸臣錄

祀郡邑忠義祠仲弟翰萬厯丙午武

舉性亦敏詩文皆走筆偶習武即得雋未仕先卒

采雲山房集

刻有茹霞稿

番禺志

與上桂諸稿同時燼

于兵上桂子駿超駿超皆庠生父喪畢不復就試

食力養母以終

采雲山房集

袁崇煥字元素東莞水南人

進士題名碑廣西梧州府平南縣

志選表作

萬厯丙午鄉薦四十七年己未進

士授邵武知縣為人慷慨負膽畧好談兵遇老校

退卒輒與論塞上事曉其阨塞情形以邊才自許

天啓二年正月朝覲在都御史侯恂請破格用之

遂擢兵部職方主事無何廣寧師潰廷議扼山海

關崇煥即單騎出關關內外中失袁主事訝之

家人亦莫知所往已還朝具言關上形勢曰予我

軍馬錢穀我一人足守此廷臣益稱其才遂超擢

僉事監關外軍發帑金二十萬俾招募時關外地

悉爲哈刺慎諸部所據崇煥乃駐守關內未幾諸

部受款經畧王在晉令崇煥移駐中前所監參將

周守廉遊擊左輔軍經理前屯衛事尋令赴前屯

安置遼人之失業者崇煥即夜行荆棘虎豹中以

四鼓入城將士莫不壯其膽在晉深倚重之題爲

寧前兵備僉事然崇煥薄在晉無遠畧不盡遵其

令及在晉議築重城八里鋪崇煥以爲非策爭不

得奏記首輔葉向高十三山難民十餘萬久困不

能出大學士孫承宗行邊崇煥請將五千人駐寧

遠以壯十三山勢別遣驍將救之寧遠去山二百

里便則進據錦州否則退守寧遠奈何委十萬人

置度外承宗謀於總督王象乾象乾以關上軍方

喪氣議發插部護關者三千人往承宗以爲然告

在晉在晉竟不能救衆遂沒脫歸者僅六千人而

己及承宗駁重城議集將吏謀所守閭鳴泰主覺

華崇煥主寧遠在晉及張應吾邢慎言持不可承

宗竟主崇煥議已承宗鎮關門益倚崇煥崇煥內

拊軍民外飭邊備勞績大著崇煥嘗核虛伍立斬

一校承宗怒曰監軍可專殺耶崇煥頓首謝其果

於用法類此三年九月承宗決守寧遠僉事萬有

孚劉詔力阻不聽命滿桂偕崇煥往初承宗令祖

大壽築寧遠城大壽度中朝不能遠守築僅十一

且疎薄不中程崇煥乃定規制高三丈二尺雉高

六尺址廣三丈上二丈四尺大壽與參將高見賀

謙分督之明年迄工遂爲關外重鎮桂良將而崇

煥勤職誓與城存亡又善撫將士樂爲盡力由是商旅輻輳流移駢集遠近望爲樂土遭父憂奪情視事四年九月偕大將馬世龍王世欽率水陸馬步軍萬二千東巡廣寧謁北鎮祠歷十三山抵右屯遂由水道泛三岔河而還尋以五防叙勞進兵備副使再進右叅政崇煥之東巡也請卽復錦州右屯諸城承宗以爲時未可乃止至五年夏承宗與崇煥計遣將分據錦州松山杏山右屯及大小凌河繕城郭居之自是寧遠且爲內地開疆復二百里十月承宗罷高第來代謂關外必不可守令盡撤錦右諸城守具移其將士於關內督屯通判金啓棕上書崇煥曰錦右大凌三城皆前鋒要地倘收兵退旣安之民庶復播遷已得之封疆再淪沒關內外堪幾次退守耶崇煥亦力爭不可言兵法有進無退三城已復安可輕撤錦右動搖則寧前震驚關門亦失保障今但擇良將守之必無他慮第意堅且欲并撤寧前二城崇煥曰我寧前道也官此當死此我必不去第無以難乃撤錦州右屯大小凌河及松山杏山塔山守具盡驅屯兵八關委棄米粟十餘萬而死亡載途哭聲震野民怨而軍益不振崇煥遂乞終制明史本傳疏曰爲君恩當報子道難虧伏乞聖明俯容守制以重彝倫以崇

孝治事該臣以寧前道於前月二十二日接家報臣父袁子鵬於七月初五日以疾歿里門當卽申報督撫隨蒙撫院批允印交關內道副使劉詔署掌臣卽移會戶部管餉員外唐登儁及關內道又牌行各廳陸續運同知毛宗養等查有本道經批不明錢糧可乘道在任查明隨經員外唐登儁等回稱並無不明錢糧各廳俱有甘結隨卽粘連印結申報各督撫餉關衙門奉閣撫批允離任已於本月初二日長行北至豐潤縣接邸報該總督蒞遼吳用光題爲寧前衝缺道藩籬頓虛懇乞聖明就近允補以濟急需事奉聖旨寧前重地袁崇煥不准守制着照舊供職竊謂臣小臣也以知縣而擢用則皇上特旨之所留也山石道公錯而被糾則皇上特旨之所寬也茲奪情又蒙特旨矣從來外吏所無之殊遇萃臣一身臣卽捐糜無足云報尙有可愛惜之膚髮乎惟是奔喪報本萬世不刊之典故丁憂爲守制蓋制之所定而不可踰易也先王以孝治天下孝之爲言教也又考也教天下以孝而治成也我皇上德隆虞舜化比成周正以孝道致治三年之愛一本之恩度越前代爲獨以還微小臣限之以守制之情貽之以終天之恨固將爲封疆計也然臣已在關上四年矣熱心自許力

阻時遼毫無建立雖皇上不以爲罪臣心則以爲慚卽無憂當去況大故相推哀毀之過神情忡悼方寸無主安足以再辦機宜骨立形消卽拜起俱倩人扶此畿東府縣官所見者安能馳驅戎馬如前日蓋勢無可留而臣之情不容已又力不可支徒棄禮廢法以速罪戾此臣義之所不敢出也若夫家變突遭臣一刻難安而縮地無術一己之私又不敢控之皇上者也伏乞皇上察臣烏烏至情容臣回籍終制臣倘不從先臣地下過此有生之年皆皇上犬馬之日也臣外吏也例該呈撫院代題但臣已繳過印勅趨程在道爲此具本差家人袁相恩具奏臣無任哀懼迫切之至再乞守制疏曰臣於本月十二日奏爲君恩當報子道難虧伏乞皇明俯容守制以重養倫以崇孝治事奉聖旨邊疆重任袁崇煥着遵前旨照舊供職不必再陳該部知道欽此竊惟臣何官也而再辱皇上之明命將趨踰捐糜之不暇何敢再陳但守制大典至大典之不克遂則曰奪情夫情而奪之事爲拂經心爲殘忍殘忍拂經尙何顏以抗于將吏之上軍中少長有禮吉凶以時臣先爲不律之身執何紀以律兵士而天理良心寸衷有赫臣亦欲奪情而情之不可奪者已煎灼于臣之肺腑矣況臣絕裾

以出臣父再見無期舐犢之思憂鬱而沒臣父之死因臣而臣之身不還之於父令其九原貽痛仍是望子之魂一夫足闕天地之和是父是子遂不足動皇上之惻隱乎若從封疆起見代臣者壯心偉畧過臣數倍閱督撫之爲封疆計當不後于皇上若敵情之急臣必哀服臨戎自不能去焉用皇上之督促憶廣寧初潰之日皇上何嘗督促而臣自匹馬過行身旣在朝爲臣死忠業已蒙皇上之許可今終天之恨爲子死孝獨不蒙皇上之矜憐如使臣還任而有補也臣亦何惜裂此身之檢以爲皇上馳驅但聞訃至今淚血已枯氣息將盡卽勉強撐離魂之殼以回車終必哀毀憂思而待盡皇上畱一死臣以在邊用而不得用何如放一生臣以還里不用而後日仍用之此臣極悲極苦歷血而再控之皇上者也臣豈不知身位微薄不宜再瀆天聰然悲從中來遂已冒皇上之斧鉞矣伏乞皇上孝思遐布恩恤臣私容臣回籍守制用其身而且燭其隱天下將仰明主之能曲體臣私應馬骨以來者不期而至矣臣再冒天威不勝悚懼隕越之至三乞給假疏曰爲仰遵明旨給假奔喪懇乞俯察臣心曲全孝道事該臣於本月十五日奏前事奉聖旨袁崇煥身任疆場本朝原有起復

故事如何堅求守制顯是避難推誘姑不究還着遵旨行不必再來瀆擾該部知道欽此除臣力疾設香案望闕叩頭謝恩外竊念皇上刻意求治簡賢擇能凡叨任使之榮俱慶風雲之遇尚有沈抑下寮欲效犬馬而不可得者臣三奉明綸委任愈切若不當去而去與當留而不留臣無論負明主且昧本心將狗彘不食臣餘矣但奔喪爲守制不奔喪爲奪情制定於天安可以人亂猶情根於性豈可以事移亂制拂情必無法之地與無人之野而後可語曰求忠臣於孝子之門臣今守制奔喪猶天啓二年之策馬出塞也彼時臣敢以父子之私而緩視疆場之急皇上將禁之不令往乎今敵情稍緩屯種行方臣得以離任之日值茲大變又無容臣不離任之時奪情往或有之然皆苟且功名甘蒙清議臣素知大義忍逆天常此制之萬無可留者也若臣之情愈苦矣臣自萬歷四十六年幸叨一第卽授令之閩離家今七年矣七年中臣之嫡兄崇燦喪矣嫡叔子騰喪矣堂兄生員崇茂育於臣父爲猶子者今亦喪矣諸喪暴露各有家口俱待食于臣父臣父非有厚產不過終歲拮据今臣父已矣止一切弟崇燾少不諳事一切生待養而死待葬者俱臣一人自爲令至今未嘗餘一

錢以負陛下昨聞訃之日諸臣憐臣之不能爲行李自開督撫以下醵金爲賻臣擇而受之束裝遄歸以襄臣大事此外如臣叔臣兄死爲之葬生爲之父臣養不及臣父猶不致貽臣父含痛九原此臣明發血心又甚於不可已之制者也披瀝再陳未蒙俞允自維封疆小吏力薄誠微生殺去留惟皇上所命皇上網常名教主尊皇上卽所以重倫常此臣所以不敢再求終喪而轉求給假者蓋情之萬萬不獲已者也伏望皇上孝治天下仁及南荒下部議覆姑准臣給假回籍臣鄉九千里百日可往還二百日又以百日襄臣父窆窆之事并經紀叔兄暴露未葬之三喪凍餒無依之八口臣卽策馬前來計此時皇上天威廓清邊塞而經營疆理尙自需人臣更不敢圖官爵舉家屯種可佐軍儲此臣狗馬之心矢之天日者也如皇上封疆念重不容臣守制又不容臣給假臣再敢有詞哉惟抱臣父之靈於通州泣涕以死與先魂相依於地下皇上卽責臣負恩臣知罪矣爲此具奏臣三冒天威不勝死罪之至奉旨袁崇煥不以君命爲重連章瀆擾還着遵旨供職不准給假事十二月進按察使視事如故我

大清知經畧易與六年正月舉大軍西渡遼河二十

三日抵寧遠崇煥聞卽偕大將桂副將左輔朱海
參將大壽守備何可剛等集將士誓死守崇煥更
刺血爲書激以忠義爲之下拜將士咸請效死乃
盡焚城外民居攜守具入城清野以待令同知程
維模詰奸通判啟侑具守卒食辟道上行人檄前
屯守將趙率教山海守將楊應科士逃至者悉斬
人心始定明日

大軍進攻戴楯穴城矢石不能退崇煥令閫卒羅立
發西洋巨礮傷城外軍明日再攻復被却圍遂解
而啓侑亦以然礮死初中朝聞警兵部尙書王永
光大集廷臣議戰守無善策經畧弟總兵麒麟擁
兵關上不救中外謂寧遠必不守及崇煥以書聞
舉朝大喜立擢崇煥右僉都御史璽書獎勵桂等
進秩有差我

大清新解圍分兵數萬畧覺華島殺參將金冠等及
軍民數萬崇煥方完城力竭不能救也高第鎮關
門大反承宗政務折辱諸將將咸解體遇麒麟若
偏裨麒麟至見侮其卒至是坐失援第麒麟並褫官去
而以王之臣代第趙率教代麒麟

大清舉兵所向無不摧破諸將罔敢議戰守議戰守
自崇煥始三月復設遼東巡撫以崇煥爲之魏忠
賢遣其黨劉應坤紀用等出鎮崇煥抗疏諫不納

叙功加兵部右侍郎賚銀幣世廕錦衣千戶崇煥
旣解圍志漸驕與桂不協請移之他鎮乃召桂還
崇煥以之臣奏畱桂又與不協中朝慮債事命之
臣專督關內以關外屬崇煥盡闕守崇煥虞廷臣
忌已上言陛下以關內外分責二臣用遼人守遼
土且守且戰且築且屯屯種所入可漸減海運大
要堅壁清野以爲體乘間擊瑕以爲用戰雖不足
守則有餘守旣有餘戰無不足顧勇猛圖敵敵必
讐奮迅立功衆必忌任勞則必召怨蒙罪始可有
功怨不深則勞不著罪不大則功不成謗書盈篋
毀言日至從古已然惟聖明與廷臣始終之帝優
旨褒答其冬崇煥偕應坤用率教巡歷錦州大小
凌河議大興屯田漸復第所棄舊土忠賢與應坤
等並因是廕錦衣崇煥進所廕爲指揮僉事崇煥
遂言遼左之壞雖人心不固亦緣失有形之險無
以固人心兵不利野戰祇有憑堅城用大礮一策
今山海四城旣新當更修松山諸城班軍四萬人
缺一不可帝報從之先是八月中我

太祖高皇帝畧駕崇煥遣使弔且以覘虛實我

太宗文皇帝遣使報之崇煥欲議和以書附使者還報我

大清兵將討朝鮮欲因此阻其兵得一意南下七年
正月再遣使答之遂大興兵渡鴨綠江南討朝議

以崇煥之臣不相能召之臣還罷經畧不設以關內外盡屬崇煥與鎮守中官應坤用並便宜從事崇煥銳意恢復乃乘

大軍之出遣將繕錦州中左大凌三城而再使使持書議和會朝鮮及毛文龍同告急朝命崇煥發兵援崇煥以水師援文龍又遣左輔率教朱梅等九將將精卒九千先後逼三岔河爲牽制之勢而朝鮮已爲

大清所服諸將乃還崇煥初議和中朝不知及奏報優旨許之後以爲非計類旨戒諭崇煥欲藉是修政疆持愈力而朝鮮及文龍被兵言官因謂和議所致四月崇煥上言關外四城雖延袤二百里北負山南阻海廣四十里爾今屯兵六萬商民數十萬地隘人稠安所得食錦州中左大凌三城修築必不可已業移商民廣開屯種倘城不完而敵至勢必撤還是棄垂成功也故乘敵有事江東姑以和之說緩之敵知則三城已完戰守又在關門四百里外金湯益固矣帝優旨報聞時率教駐錦州護版築朝命尤世祿來代又以輔爲前鋒總兵官駐大凌河世祿未至輔未入大凌五月十一日大清兵直抵錦州四面合圍率教偕中官用嬰城守而遣使議和欲緩師以待救使三返不決圍益急

崇煥以寧遠兵不可動選精騎四千令世祿大壽將繞出

大軍後決戰別遣水師東出相牽制且請發薊鎮宣大兵東護關門朝廷已命山海滿桂移前屯三屯孫祖壽移山海宣府黑雲龍移一片石薊遼總督閻鳴泰移關城又發昌平天津保定兵馳赴上關檄山西河南山東守臣整兵聽調世祿等將行

大清已於二十八日分兵趨寧遠崇煥與中官應坤副使畢自肅督將士登陣守列營濠內用礮距擊而桂世祿大壽大戰城外士多死桂身被數矢

大軍亦旋引去益兵攻錦州以海暑不能克士卒多損傷六月五日亦引還因毀大小凌河二城時稱寧錦大捷桂率教功爲多忠賢因使其黨論崇煥不救錦州爲募氣崇煥遂乞休而以王之臣代爲督師兼遼東巡撫駐寧遠及叙功文武增秩賜廕者數百人忠賢子亦封伯而崇煥止增一秩尚書霍維華不平疏乞讓廕忠賢亦不許未幾熹宗崩莊烈帝卽位忠賢伏誅削諸昌功者廷臣爭請召崇煥其年十一月擢右都御史視兵部添注左侍郎事崇禎元年四月命以兵部尚書兼右副都御史督師薊遼兼督登萊天津軍務所司欵促上道七月崇煥入都先奏陳兵事帝召見平臺慰勞甚

至咨以方畧對曰方畧已具疏中臣受陛下特眷願假以便宜計五年全遼可復帝曰復遼朕不吝封侯賞卿努力解天下倒懸卿子孫亦受其福崇煥頓首謝帝退少憩給事中許譽卿叩以五年之畧崇煥言聖心焦勞聊以是相慰耳譽卿曰上英明安可漫封異日按期責效奈何崇煥慨然自失頃之帝出卽奏言東事本不易竣陛下旣委臣臣安敢辭難但五年內戶部轉軍餉工部給器械吏部用人兵部調兵選將須中外事事相應方克有濟帝爲飭四部臣如其言崇煥又言以臣之力制全遼有餘調衆口不足一出國門便成萬里忌能妬功夫豈無人卽不以權力掣臣肘亦能以意見亂臣謀帝起立傾聽諭之曰卿無疑慮朕自有主持大學士劉鴻訓等請收還之臣桂尙方劍以賜崇煥假之便宜帝悉從之賜崇煥酒饌而出崇煥以前此熊廷弼孫承宗皆爲人排搆不得竟其志上言恢復之計不外臣昔年以遼人守遼土以遼士養遼人守爲正著戰爲奇著和爲旁著之說法在漸不在驟在實不在虛此臣與諸邊臣所能爲至用人之人與爲人用之人皆至尊司其鑰何以任而勿貳信而勿疑蓋馭邊臣與廷臣異軍中可驚可疑者殊多但當論成敗之大局不必摘一言

一行之微瑕事任旣重爲怨實多諸有利於封疆者皆不利於此身者也況圖敵之急敵亦從而間之是以爲邊臣甚難陛下愛臣知臣臣何必過疑懼但中有所危不敢不告帝優詔答之賜蟒玉銀幣疏辭蟒玉不受是月川湖兵戍寧遠者以缺餉四月大譟餘十三營起應之縛繫巡撫畢自肅總兵官朱梅通判張世榮推官蘇涵淳于譙樓上自肅傷重兵備副使郭廣初至躬翼自肅括撫賞及朋椿二萬金以散不厭貨商民足五萬乃解自肅疏引罪走中左所自經死崇煥以八月初抵關聞變馳與廣密謀宥首惡楊正朝張思順令捕十五人戮之市斬知謀中軍吳國琦責叅將彭簪古黜都司左良玉等四人發正朝思順前鋒立功世榮涵淳以貪虐致變亦斥之獨都司程大樂一營不從變特爲獎勵一方乃靖關外大將四五人事多掣肘後定設二人以梅鎮寧遠大壽仍駐錦州至是梅將解任崇煥請合寧錦爲一鎮大壽仍駐錦州加中軍副將何可剛都督僉事代梅駐寧遠而移薊鎮率教於關門關內外止設二大將因極稱三人之才謂臣自期五年專藉此三人當與臣相終始屆期不效臣手戮三人而身歸死於司敗帝可之崇煥遂畱鎮寧遠自肅旣死崇煥請停巡撫

及登萊巡撫孫國楨免崇煥又請罷不設帝亦報可哈刺慎三十六家向受撫賞後爲樺漢所迫且歲饑有叛志崇煥召至於邊親撫慰皆聽命二年閏四月叙春秋兩防功加太子太保賜蟒衣銀幣霞錦衣千戶崇煥始受事卽欲誅毛文龍文龍者仁和人以都司援朝鮮逗遛遼東遼東失自海道遁回乘虛襲殺

大清鎮江守將報巡撫王化貞而不及經畧熊廷弼兩人隙始開用事者方主化貞遂授文龍總兵累加至左都督掛將軍印賜尙方劍設軍鎮皮島如內地皮島亦謂之東江在登萊大海中綿亘八十里不生草木遠南岸近北岸海面八十里卽抵大清界其東北海則朝鮮也島上兵本河東民自天啓元年河東失民多逃島中文龍籠絡其民爲兵分布哨船聯接登州以爲犄角計中朝是之島事由此起四年五月文龍遣將沿鴨綠江越長白山侵

大清國東偏爲守將擊敗衆盡殲八月遣兵從義州城西渡江入島中屯田

大清守將覺潛師襲擊斬五百餘級島中糧悉被焚五年六月遣兵襲耀州之官屯寨敗歸六年五月遣兵襲鞍山驛喪其卒千餘越數日又遣兵襲倣

爾河攻城南爲

大清守將所却七年正月

大清兵征朝鮮并規剿文龍三月

大清兵克義州分兵夜擣文龍於鐵山文龍敗遁歸島中時

大清惡文龍驍後故致計朝鮮以其助文龍爲兵端顧文龍所居東江形勢雖足牽制其人本無大畧往輒敗衄而歲糜餉無算且惟務廣招商賈販易禁物名濟朝鮮實關出塞無事則鬻參販布爲業有事亦罕得其用工科給事中潘士聞劾文龍糜餉殺降尙寶卿董茂忠請撤文龍治兵關寧兵部議不可而崇煥心弗善也嘗疏請遣部臣理餉文龍惡文臣監制抗疏駁之崇煥不悅及文龍來謁接以賓禮文龍又不讓崇煥謀益決至是遂以閱兵爲名泛海抵皮島文龍來會崇煥與相燕飲每至夜分文龍不覺也崇煥議更營制設監司文龍怫然崇煥以歸鄉動之文龍曰向有此意但惟我知東事東事畢朝鮮衰弱可襲而有也崇煥益不悅以六月五日邀文龍覲將士射先設幄山上令參將謝尙政等伏甲士幄外文龍至其部卒不得入崇煥曰予詰朝行公當海外重寄受予一拜交拜畢登山崇煥問從官姓名多毛姓文龍曰此皆

子孫崇煥笑曰爾等積勞海外月米止一斛言之痛心亦受予一拜爲國家盡力衆皆頓首謝崇煥因詰文龍違令數事文龍抗辯崇煥厲色叱之命去冠帶繫縛文龍猶倔強崇煥曰爾有十二斬罪知之乎祖制大將在外必命文臣監爾專制一方軍馬錢糧不受核一當斬人臣之罪莫大欺君爾奏報盡欺罔殺降人難民冒功二當斬人臣無將將則必誅爾奏有牧馬登州取南京如反掌語大逆不道三當斬每歲餉銀數十萬不以給兵月止散米三千有半侵盜軍糧四當斬擅開馬市於皮島私通外番五當斬部將數千人悉冒己姓副將以下濫給札付千走卒與夫盡金緋六當斬自寧遠還剽掠商船自爲盜賊七當斬強取民間子女不知紀極部下效尤人不安室八當斬驅難民遠竊人參不從則餓死島上白骨如莽九當斬輩金京師拜魏忠賢爲父塑冕旒像於島中十當斬鐵山之敗喪軍無算掩敗爲功十一當斬開鎮八年不能復寸土觀望養敵十二當斬數畢文龍喪魂魄不能言但叩頭乞免崇煥召諭其部將曰文龍罪狀當斬否皆惶怖唯唯中有稱文龍數年勞苦者崇煥叱之曰文龍一布衣爾官極品滿門封蔭足酬勞何悖逆如是乃頓首請旨曰臣今誅文

龍以肅軍諸將中有若文龍者悉誅臣不能成功皇上亦以誅文龍者誅臣遂取尙方劍斬之帳前乃出諭其將士曰誅止文龍餘無罪當是時文龍麾下健校悍卒數萬憚崇煥威無一敢動者於是命棺殮文龍明日具牲醴拜奠曰昨斬爾朝廷大法今祭爾僚友私情爲下淚乃分其卒二萬八千爲四協以文龍子承祚副將陳繼盛參將徐敷奏游擊劉興祚主之收文龍敕印尙方劍令繼盛代掌犒軍士檄撫諸島盡除文龍虐政還鎮以其狀上聞末言文龍大將非臣得擅誅謹席藁待罪時崇正二年五月也帝驟聞意殊駭念旣死且方倚崇煥乃優旨褒答俄傳諭暴文龍罪以安崇煥心其爪牙伏京師者令所司捕崇煥上言文龍一匹夫不法至此以海外易爲亂也其衆合老稚四萬七千妄稱十萬且民多兵不能二萬妄設將領千今不宜更置帥卽以繼盛攝之于計便帝報可崇煥雖誅文龍慮其部下爲變增餉銀至十八萬然島弁失主帥心漸携益不可用其後致有叛去者崇煥言東江一鎮牽制所必資今定兩協馬軍十營步軍五歲餉銀四十二萬米十三萬六千帝頗以兵減餉增爲疑以崇煥故特如其請崇煥在遼與率教大壽可剛定兵制漸及登萊天津及定東

江兵制合四鎮兵十五萬三千有奇馬八萬一千有奇歲費度支四百八十餘萬減舊一百二十餘萬帝嘉獎之文龍既死甫踰三月我

大清兵數十萬分道入龍井關大安口崇煥聞即督大壽可剛等入衛以十一月十日抵薊州所歷撫寧永平遷安豐潤玉田諸城皆雷兵守帝聞其至甚喜溫旨褒勉發帑金犒將士令盡統諸道援軍俄聞率教戰歿遵化三屯營皆破巡撫王元雅總兵朱國彥自盡

大清兵越薊州而西崇煥懼急引兵入護京師營廣渠門外史纂作沙河門外帝立召見深加慰勞谷以戰守策賜御饌及貂裘崇煥以士馬疲敝請入休城中不許出與

大軍鏖戰互有殺傷時所入隘口乃薊遼總理劉策所轄而崇煥甫聞變即千里赴救自謂有功無罪然都人驟遭兵怨譟紛起謂崇煥縱敵擁兵朝士因前通和議誣其引敵脅和將爲城下之盟帝頗聞之不能無惑會我

大清設間謂崇煥密有成約令所獲宦官知之陰縱使去其人奔告於帝帝信之不疑十二月朔再召對遂縛下詔獄大壽在旁戰栗失措出即擁兵叛歸大壽嘗有罪孫承宗欲殺之愛其才密令崇煥

救解大壽以故德崇煥懼并誅遂叛帝取崇煥獄

中手書往召大壽乃歸命方崇煥在朝嘗與大學

士錢龍錫語微及欲殺毛文龍狀及崇煥欲成和

議龍錫嘗移書止之龍錫故主定逆案魏忠賢遺

黨王永光高捷袁宏勳史堃輩謀興大獄爲逆黨

報讐見崇煥下吏遂以擅主和議專戮大帥二事

爲兩人罪捷首疏力攻堃宏勳繼之必欲并誅龍

錫法司坐崇煥謀叛龍錫亦論死三年八月遂磔

崇煥於市兄弟妻子流三千里籍其家崇煥無子

家亦無餘資天下冤之崇煥既縛大壽憤而去武

經畧滿桂以趣戰急與

大清兵戰竟死去縛崇煥時甫半月初崇煥妄殺文

龍至是帝誤殺崇煥自崇煥死邊事益無人明亡

徵決矣明史乾隆四十七年欽奉

上諭朕披閱明史袁崇煥督師薊遼尙能忠於所事而其

時主闇政昏不能聲其忱悃以致身罹重辟深可憫惻

特加恩官其五世孫炳爲峽江縣丞東莞志嘉慶元年崇祀

鄉賢事實錄

霍子衡字覺商王鳴雷撰傳作覺雙南海人舉萬曆中丙午

鄉試除海康教諭累遷國子監助教都察院司務

戶部員外郎中歷袁州知府廉潔自持政聲丕著南海志聿錫之自立於廣州也召子衡爲太僕卿而

廣州不守子衡乃召妾莫氏及三子應蘭應荃應
正員語之曰禮臨難毋苟免若輩知之乎三子
皆應曰惟大人命子衡援筆大書忠孝節烈之家
六字懸中堂易朝服北向拜又易絺袍謁家廟先
赴井死妾莫氏從之應蘭偕妻梁氏及一女繼之
應荃應芷偕其妻徐氏區氏又繼之惟三孫得存
應死時以付老僕
撫之以存宗祀也有小婢亞長見之亦投井死
陳子
壯傳事聞部院佟養甲總兵李成棟親往祭奠表
其門曰閨門死節之家
南海志

國朝賜諡烈愍
勝朝殉節
諸臣錄

謹案郭景相郡庠生番禺人見舊番禺志

黃烈婦傳黃氏南海崇正丙子孝廉日寧

女郭景相妻僅生一女庚寅

王師恢廣景相死之氏偕女投井死翁陽齡爲立嗣而
收其骨合葬于北門外牛眠岡銘其墓曰
夫死于難婦死于節白刃不回淵水表烈
同時有樊良佐妻周氏及女媳十餘口投
池死邑庠生黎士奇同妻樊氏子周庠生
李應春母樊氏孝廉樊于震之孫玉璽玉
球皆投水死庠生樊廷槐之父蜚譽與其
叔崇韜程萬朝坦弟國璋日觀皆男婦同
縊死據此則梁朝鍾梁萬爵廖翰標三人

實同時死各有專傳外其不同時死者如
郭景相樊良佐黎士奇李應春樊廷槐等
事真情確例得並書玉璽玉球實樊于震
之孫非姓孫也亦投水死亦得並書考樊
于震番禺龍眼洞人爲嘉靖三十四年乙
卯科舉人計至順治庚寅凡九十二年其
人應百餘歲當時因其孫及稱乃祖于震
並非同時殉節可知矣附此俟考

黃公輔字振璽新會人成化丁未進士印之元孫
萬厯壬子鄉薦丙辰進士知福州浦城縣薄歛省
刑民甚德之晉南京山西道御史多所建白有府
屬誤干文網力爲昭雪餽以醢發之金也還其金
而切責之劾權璫魏忠賢李實言甚激切留中不
報旋削奪回籍璫敗起湖廣參議分巡湖北轉江
西副使湖民數百抵京擁政府楊嗣昌門責其不
爲桑梓保障計楊懼特疏題留還公輔于楚晉參
政分守寶慶因入賀上疏言流賊猖獗勢將燎原
征討宜急等事上嘉納賜宴優渥越二年兼備兵
鎮長沙值賊犯城公輔設伏擒斬三千餘始定未
幾復回寶慶臨藍賊萬餘逼城督兵逆擊搗其巢
擒賊首斬之餘黨悉平上功加俸二級錄蔭一子
尋會推都御史撫治偏沅以病辭歸癸未起太僕

卿轉南左通政刑部侍郎晉兵尚皆不拜鼎革後
避地新寧卒年八十有四新會志

陳子壯字集生號秋濤南海沙貝人母夢神人以

丹桂枝拂其腹曰俾爾生兒流芳百世及生異香

滿室年十六試冠邑弟子員由番禺學中式萬曆

乙卯鄉試萬曆四十七年己未以進士第三人授

翰林編修同充修史館天啓元年辛酉奉使祭南

海神四年甲子典浙江鄉試發策刺闕明史本傳閣

築鵲落成欲子壯書元勳二字扁於堂以示威尊

曰書此當得好官子壯堅却魏忠賢怒撫拾浙江

鄉試錄有庸主失權英主攬權等語為誹謗狀行創

子壯及其父給事中熙昌籍崇禎初起子壯故官

明史以左春坊左諭德召用父亦遷吏科都給事中

會病卒詔贈太常寺少卿居憂哀毀服既闋不入

官崇禎四年辛未以資深起詹事府少詹兼翰林

院侍讀學士五年壬申纂修玉牒告成狀行累遷禮

部右侍郎流賊犯皇陵帝素服召對廷臣子壯言

今日所急在收人心宜下罪己詔激發忠義帝納

之乃會諸臣列上蠲租清獄使過宥罪等十二事

帝以海內多故思廣羅賢才下詔援祖訓郡王子

孫文武堪任用者得考驗授職子壯慮為民患立

陳五不可會唐王上疏歷引前代故事詆子壯遂

除子壯名下之獄坐贖徒歸明史上疏謝恩取道南

還闕雲淙別墅於城北白雲山中復修南園舊社

行久之廷臣交薦起故官協理詹事府未上京師

陷明史子壯在羊城聞報成服率諸縉紳設位光孝

寺哀臨泣血幾死狀行福王立起禮部尚書明史時首

輔馬士英專理機密與阮大鍼朋比為奸由是與

子壯有隙後子壯每有謀策輒沮抑不行五月初

九日聞

大兵破揚州尅日將臨金陵子壯趨朝請旨設法守

禦為馬士英所阻不得入覲往會掌京城戎政忻

城伯趙芝龍條陳守禦機宜趙芝龍曰聞史可法

鎮揚州竭力守禦大小十餘戰自謂能軍猶且卒

至破敗今南京人情洶洶兵微將寡各鎮之兵不

聽徵召戰固無功守亦豈萬全之策子壯曰今日

之所賴者非戰則守耳至云守非萬全然則尊意

若何趙芝龍曰予固未有勝算然用兵而不計強

弱不問衆寡是所謂驅羸羊而與猛虎鬥也事必

不濟矣子壯知其有降意也辭出因念錢謙益平

素交厚往見謙益曰金陵尅日受兵馬士英嫉賢

妬能盡感宸聽趙芝龍色厲內荏心悸叵測事勢

如此將若之何謙益聞子壯言唯唯而已子壯曰

今亡在旦夕正人臣誓死效忠之時乃人各一心

大事去矣長歎而出是夜三鼓馬士英竟挾王與太后闔宮潛遁次日子壯始驚覺而

大兵已次于金陵之北郊二十一日趙芝龍與錢謙益等出城降子壯遂微服潛出聚寶門一路訪尋駕蹕由太平走蕪湖聞王被執北去過杭州在陳華宇家得接慈禧太后星馳還粵集旅勤王懿旨遂取道南還閏六月十五日南安伯鄭芝龍福建巡撫張肯堂等擁唐王聿鍵立福建子壯二十二日抵家觀朱太夫人於五羊城依戀慈幃太夫人曰聞南京已破吾以汝爲死矣今福王何在汝何獨自回子壯爲具述君臣失散之由泣然流涕太夫人勉之曰盡忠卽以盡孝汝毋以我故藉口養親若徒知事我以生是反速我以死也子壯涕泣受教秋七月初三日子壯見粵督丁魁楚言桂王之子永明王爲神宗孫謀與迎立魁楚曰公猶未知唐王於前月十五日卽位福州乎子壯曰福州旣立斷無更立之理魁楚曰公今將何如子壯曰肅宗以青宮而克復光武以支派而中興但願君則以臥薪嘗膽臣則以反首拔舍戮力同心上以答列祖之靈下以慰兆民之望何必以迎立之故執成見哉行唐王召相子壯以前議宗室事有宿憾辭不行明史後遵慈訓赴召福州門人黎遂球亦以

禮部員外郎召用子壯至雄府時唐王以逆宗靖江王僭亂懼其侵奪廣州也乃加子壯東閣大學士兵部尚書着與粵督丁魁楚領督萬元吉同辦軍務不必入覲子壯遂留雄乃命黎遂球赴贛州助萬元吉以爲聲援十二月初八日適有山賊擁衆數千攻圍雄都子壯率士卒登陴防禦出奇兵勦殺賊敗散而去行順治三年子壯自雄歸廣以奉旨協辦軍務乃捐貲召募得衆二千餘人日夜訓練九月初聞

大兵入閩總兵周之藩衛主戰死唐王被執汀州遽變報至慟哭曰今福州旣亡永明王現駐端州乃遣人至端州奉表勸進十月丁魁楚兵敗還粵見子壯云至中途聞

大兵陷贛城萬元吉赴水死兵部員外郎黎遂球與弟遂琪俱陣亡子壯聞之太息因以勸進端州事行丁魁楚等擁立桂王子永明王由榔於肇慶蘇觀生又議立唐王弟聿錫子壯沮不得退居邑之九江村永明王授子壯東閣大學士兼兵部尚書督廣東福建江西湖廣軍務會

大兵入廣州聿錫被執死子壯止不行明年丁亥春張家王陳邦彥及新會王興潮陽賴其肖先後起兵子壯亦以八月起兵九江村兵多蛋戶番鬼善